

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**PRIJEDLOG**

**ZAKON  
O GRADU TUZLA**

**Sarajevo, decembar 2013. godine**

## **PRIJEDLOG ZA DONOŠENJE ZAKONA PO SKRAĆENOM POSTUPKU**

Predlažemo da se Prijedlog zakona o Gradu Tuzla razmatra i donese po skraćenom postupku, u skladu sa članom 172. Poslovnika Predstavničkog doma („Službene novine Federacije BiH“, br. 69/07 i 2/08) i članom 164. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03 i 21/09) obzirom da nije u pitanju složen i obiman zakon.

# **ZAKON O GRADU TUZLA**

## **Član 1. Predmet Zakona**

U skladu sa uslovima iz člana 5. stav 3. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06) ovim Zakonom se uspostavlja Grad Tuzla, određuje njegova teritorija, svojstvo, organi, način izbora gradskog vijeća i gradonačelnika, uređuje donošenje privremene statutarne odluke, donošenje statuta, odredbe zakona koji se stavljaju van snage i druga pitanja od značaja za primjenu ovog Zakona.

## **Član 2. Teritorija**

Teritoriju Grada Tuzle čine sva naseljena mjesta, koja su se prema evidenciji Federalnog zavoda za statistiku nalazila u okviru Općine Tuzla na dan stupanja na snagu ovog Zakona.

## **Član 3. Svojstvo**

Grad Tuzla je jedinica lokalne samouprave i ima svojstvo pravne osobe.

## **Član 4. Samoupravni organi**

- (1) Samoupravni organi Grada Tuzle su gradsko vijeće i gradonačelnik.
- (2) Samoupravni organi Grada Tuzle poslove iz svoje nadležnosti vrše u skladu sa Ustavom, zakonom i Statutom Grada.
- (3) Mandat vjećnika gradskog vijeća i gradonačelnika je četiri godine.

## **Član 5. Gradsko vijeće**

- (1) Organ odlučivanja grada Tuzle je Gradsko vijeće.
- (2) Broj članova Gradskog vijeća određuje se Statutom grada.
- (3) Gradsko vijeće grada Tuzle bira se demokratskim putem na neposrednim i tajnim izborima na području cijelog grada.

## **Član 6.**

## **Gradonačelnik**

(1) Izvršni organ Grada Tuzle je gradonačelnik.

(2) Gradonačelnik grada Tuzle bira se u skladu sa Zakonom o izboru, prestanku mandata, opozivu i zamjeni načelnika općina u Federaciji ("Službene novine Federacije Bosne i Hercegovine", broj 19/08).

## **Član 7. Statut**

(1) Grad Tuzla ima Statut.

(2) Statutom Grada Tuzle propisuje se i uređuje samoupravni djelokrug Grada, njegova obilježja, sjedište, javna priznanja, organizacija, ovlaštenja i način rada njegovih organa, međusobni odnosi gradskog vijeća i gradonačelnika, oblici neposrednog odlučivanja građana, saradnja s drugim jedinicama lokalne samouprave i druga pitanja od značaja za Grad.

(3) Statut Grada Tuzle mora biti u skladu sa Ustavom Federacije Bosne i Hercegovine, Ustavom Tuzlanskog kantona i federalnim i kantonalnim zakonodavstvom.

(4) Statut Grada Tuzla priprema i usvaja Gradsko vijeće dvotrećinskom većinom vijećnika Gradskog vijeća.

## **Član 8. Pravno sljedništvo**

(1) Grad Tuzla je pravni sljednik Općine Tuzla i ima Ustavom i Zakonom određene nadležnosti Grada, i preuzima nadležnosti, prava, obaveze i imovinu općine, čiji je pravni sljedbenik.

(2) Vijećnici Općinskog vijeća Tuzla i Načelnik Općine Tuzla, izabrani na općinskim izborima održanim 07. oktobra 2012. godine, stupanjem na snagu ovog Zakona, nastavljaju sa radom kao vijećnici Gradskog vijeća i Gradonačelnik Grada Tuzle.

(3) Općinske organi uprave i upravne organizacije, stručne i druge službe i drugi općinski organi, stupanjem na snagu ovog Zakona nastavljaju sa radom kao i organi i službe Grada Tuzle.

(4) Javna preduzeća i javne ustanove, čiji je osnivač općina, nastavljaju sa radom kao Javna preduzeća i ustanove Grada Tuzle.

## **Član 9. Privremena statutarna odluka**

Vijećnici izabrani na općinskim izborima za Općinu Tuzla održanim 2012. godine donijet će Privremenu statutarnu odluku Grada Tuzle u roku od dva mjeseca od dana stupanja na snagu ovog zakona, koja će važiti do donošenja Statuta Grada

**Član 10.**  
**Prestanak važenja odredaba ranijih zakona**

Stupanjem na snagu ovog zakona prestaju da važe odredbe člana 4. tačka VI. podtačka 14. Zakona o područjima općina u Socijalističkoj Republici Bosni i Hercegovini («Službeni list SRBiH», br. 47/62, 6/65, 14/65, 23/67, 3/70, 35/77, 31/78, 22/80, 28/81, 24/85i 24/86) i (Službeni list RBiH, broj: 33/90, 8/91, i 32/91) i člana 1. tačka 63. Zakona o utvrđivanju naseljenih mjesta i o izmjenama u nazivima naseljenih mjesta u određenim općinama ("Službi list SRBIH br. 24/86, 29/86, 33/90)(Službeni list RBiH 32/91, 14/04) i (Službene novine Federacije BiH", broj 59/05 i 68/05).

**Član 11.**  
**Stupanje na snagu**

Ovaj zakon stupa na snagu osmog dana od dana objavljivanja u "Službenim novinama Federacije BiH".

**O B R A Z L O Ž E N J E**

## **ZAKONA O GRADU TUZLA**

### **I - USTAVNI OSNOV**

Ustavni osnov za donošenje ovog Zakona je sadržan u odredbi člana IV. A. 5. 20. (1) d) Ustava Federacije Bosne i Hercegovine gdje je propisano da Parlament Federacije Bosne i Hercegovine donosi zakone o obavljanju dužnosti u federalnoj vlasti i u odredbi člana 5. stav 2. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06) gdje je propisano da se grad, osim ustavom, uspostavlja federalnim zakonom, na osnovu sporazuma o udruživanju dvije ili više općina odnosno odluke općinskog vijeća općine koja ispunjava propisane kriterijume iz stava 1. ovog člana, a koja ima najmanje 30.000 stanovnika, odnosno u čijem gradskom središtu kao zokruženom urbanom području živi najmanje 10.000 stanovnika. Također stavom 3. istog člana je propisano da grad u smislu ovog zakona predstavlja sjedište kantona i u slučaju neispunjavanja uvjeta iz stava 2. ovog zakona. Budući da je Općinsko vijeće Općine Tuzla usvojilo Odluku o proglašenju Grada Tuzle broj 01-05-895-2007 od 30. 01. 2007. godine, to su bili ispunjermi svi uvjeti za izradu Prednacrtu ovog zakona.

Napominjemo da je članom VI A.1. (1) Ustava Federacije Bosne i Hercegovine koji je dodan Amandmanom XVI na Ustav Federacije Bosne i Hercegovine („Službene novine Federacije BiH“, broj 13/97) utvrđeno:

„VII GRADSKE VLASTI

#### Član 1.

Za područje dviju ili više općina koje su urbano i teritorijalno povezane svakodnevnim potrebama građana formira se grad kao jedinica lokalne uprave i samouprave u skladu sa federalnim zakonom.“

Iz navedenog člana Ustava Federacije Bosne i Hercegovine vidljivo je da je Ustav izrazom „formira se“ propisano obavezu formiranja grada za područja dvije ili više općina koje su urbano i teritorijalno povezane svakodnevnim potrebama građana i predstavlja imperativnu normu, s tim da je ustavotvorac dalje propisao da se grad formira u skladu sa federalnim zakonom.

Federalni zakon o principima lokalne samouprave u Federaciji Bosne i Hercegovine („Službene novine Federacije BiH“, br. 49/06 i 51/09), propisano je u članu 5. slijedeće:

#### „Član 5.

Grad je jedinica lokalne samouprave koja predstavlja urbanu, infrastrukturnu cjelinu povezanu svakodnevnim potrebama stanovništva.

Grad se, osim ustavom, uspostavlja federalnim zakonom na osnovu sporazuma o udruživanju dviju ili više općina, odnosno odluke općinskog vijeća općine koja ispunjava propisane kriterije iz stava 1. ovog člana, a koja ima najmanje 30.000 stanovnika, odnosno u čijem gradskom središtu kao zaokruženom urbanom području živi najmanje 10.000 stanovnika.

Grad u smislu ovog zakona predstavlja sjedište kantona i u slučaju neispunjavanja uvjeta iz stava 2. ovog člana.

Izuzetno od uvjeta iz st. 1. i 2. ovog člana, gradom se može proglasiti općina od posebnog historijskog i kulturnog značaja.

Iz navedenih odredaba Ustava i Zakona slijedi zaključak da Ustav propisuje imperativnu normu za formiranje grada u određenim situacijama, ali ne zabranjuje formiranje grada u bilo kojoj situaciji, nego je to ostavljeno zakonodavcu da uredi federalnim zakonom.

Zakonodavac je, polazeći od tog ustavnog ovlaštenja Zakonom o principima lokalne samouprave previdio mogućnost formiranja grada i na području jedne općine, na osnovu odluke općinskog vijeća uz ispunjavanje određenih uvjeta (da je općina urbana infrastrukturna cjelina povezana svakodnevnim potrebama građana) i da ima najmanje 30.000 stanovnika od čega u gradskom središtu živi 10.000 stanovnika.

Osim toga utvrđeno je da se gradom može proglasiti općina od posebnog historijskog i kulturnog značaja, što svakako Općina Tuzla jeste i uz sve to je i sjedište kantona, te se na osnovu toga u smislu Zakona o principima lokalne samouprave u Federaciji Bosne i Hercegovine smatra gradom.

Kako Općina Tuzla ispunjava sve kriterije predviđene Zakonom, a Općinsko vijeće usvojilo je Odluku o proglašenju Grada Tuzle, ispunjeni su uvjeti da se Općina Tuzla proglasi Grad Tuzla i to donošenjem ovog zakona.

## **II - RAZLOZI ZA DONOŠENJE**

Tuzla je jedno od najstarijih naselja u Evropi, sa kontinuitetom življenja. Baštini najstariju proizvodnju soli u Evropi i ostatke najstarijih sojeničkih naselja u Evropi.

Arheološki dokazi o najstarijoj proizvodnji soli i ostacima najstarijeg sojeničkog naselja u Evropi, pronađeni su u centru sadašnje Tuzle i u Mjesnoj zajednici Gornja Tuzla. Ponađeni ostaci keramičkih posuda za izoljavanje ( proizvodnju soli iz slane vode), datiraju iz mlađeg kamenog doba tj. iz neolita. Iz istog perioda potiču i pronađeni ostaci sojenica.

Svoj zaključak i rezultate istraživanja o postojanju života u Tuzli od mlađeg neolita do danas, objavio je Vejsil Curčić u "Glasniku Zemaljskog muzeja Bosne i Hercegovine", broj XX iz 1908. godine. Do detaljnijih podataka o vrsti, veličini, bogatstvu i starosti naselja došlo se i 1955. godine, kada je u Rudarskoj ulici, današnjoj Džafer mahali otkopano dovoljno arheološkog materijala, koji je nedvosmisleno potvrdio da je u Tuzli postojalo veliko i bogato sojeničko naselje, jedno od najstarijih u Evropi. Arheološka istraživanja vršena od strane Zemaljskog muzeja u Sarajevu i Instituta za arheologiju Beča, nastavljena su 2002. godine. U toku 2007. i 2008. godine, prilikom kopanja temelja za gradnju zgrade "Barok", kao i prilikom gradnje Trga slobode, pronađene su velike količine ostataka keramičkih posuda za proizvodnju soli. Istraživanja u Beču, pokazala su da se radi o fragmentima posuda za izoljavanje koji datiraju iz mlađeg kamenog doba, tj. iz neolita.

Tuzla ima i posebnu geološku prošlost. Ispod grada nalaze se stotine miliona tona slanijeh stijena i slane vode, što je ostatak panonskog mora koje se sa ovih prostora povlačilo prije više od 10 miliona godina. Ime Tuzle je kroz sve vrijeme njenog postojanja, na raznim jezicima kartografa, putopisaca, historičara i osvajača, uvijek bilo vezano za so. Rijeka Jala, koja protiče kroz Tuzlu nosi naziv prema grčkoj riječi Jalos, što znači so. Osim ove riječice, Tuzlom protiče i riječica Solina, čije ime je vezano za so. Grad je kroz historiju nazivan Castron de Salenes, Salenes, Ad Salinas, Soli itd. sve do današnjeg imena koje potiče od turske riječi TUZ što znači so.

Dakle, ime Tuzle uvijek je bilo vezano za so a prema Lajošu Talociju i ime Bosne je vezano

za ovu slanu zemlju koja se danas naziva Tuzlom. U svom djelu „O ZNAČENJU IMENA BOSNA“, korijen riječi bosna je ilirskog porijekla koja označava slanu posudu iz koje se isparavanjem dobija so ili slanu zemlju.

O kontinuitetu života u Tuzli, postoje mnogobrojni dokazi iz svih historijskih perioda. Za srednjovjekovni period, karakteristični ostaci su starobosanski stećci. Neke tuzlanske nekropole stećaka već su proglašene nacionalnim spomenicima i u toku je procedura njihovog uvrštavanja u svjetsku kulturnu baštinu i stavljanja pod zaštitu UNESCO-a. O osmanskom i austrougarskom periodu, zadržani su, sačuvani i obnovljeni mnogi nacionalni historijski i kulturni spomenici i dokumenti. Isto se odnosi i na period Kraljevine SHS, Kraljevine Jugoslavije i period SFRJ.

Historija Tuzle je prožeta tolerancijom. Tolerancija u ovom gradu uvijek je shvatana kozmopolitski. Simbol otvorenih vrata nalazi se na grbu grada i danas. Tuzla je danas najmultikulturalniji grad u BiH.

Tuzla je administrativni, privredni, kulturni, univerzitetski, medicinski, sportski centar i sjedište Tuzlanskog kantona.

Tuzla je privredni centar, na čijem području djeluje preko 2500 privrednih subjekata (pravni osoba privrednih društava) i registrovano je oko 2600 obrtnika.

Privredu Tuzle čine razne privredne grane: industrija, rudarstvo, trgovine, turizam, usluge, ugostiteljstvo, poljoprivreda itd.

Tuzla je sjedište Državne regulatorne agencije za električnu energiju, što je i prirodno jer se dobar dio električne energije za potrebe naše zemlje razvija upravo u Tuzli.

Tuzla je Univerzitetski centar. Univerzitet u Tuzli je osnovan 1976. godine. Njegovom osnivanju je prethodilo konstituiranje Zajednice visokoškolskih i naučno-istraživačkih institucija u regionu Sjeveroistočne Bosne 1972. godine i Konzorcija za razvoj višeg i visokog obrazovanja i naučnoistraživačkog rada u Tuzli. Trenutno na Univerzitetu u Tuzli 15.000 studenata pohađa nastavu na postdiplomskom studiju i 1500 studenata na postdiplomskom studiju. U sklopu Tuzlanskog univerziteta trenutno ima 13 fakulteta sa mnoštvom studijskih odsjeka i oko 500 zaposlenih i vanjskih saradnika.

Tuzla je i medicinski centar sa tradicijom dugom preko 130 godina. U Tuzli egzistira Univerzitetsko-klinički centar u čijem sastavu se nalazi 16 klinika i dvije poliklinike sa pratećim službama i bolničkom ambulantom. Univerzitetski klinički centar Tuzla ima vrhunske medicinske stručnjake i pruža usluge ne samo stanovništvu Tuzle i Tuzlanskog kantona, već i šire, jer radi usluga ljudi, koji su zaposleni u ovoj ustanovi dolaze građani, koji žive u drugim područjima Bosne i Hercegovine i izvan nje. Za Univerzitetsko-kliničkim centrom, nimalo ne zaostaje Javna ustanova Dom zdravlja "Dr. Mustafa Šehović" Tuzla, koja ima u svom sastavu 10 poliklinika u kojima radi 700 zaposlenika, među kojima preko 200 ljekara (doktora nauka, magistara, specijalista raznih struka i drugog visokostručnog medicinskog osoblja).

Kulturnu tradiciju Tuzle i okoline obilježili su brojni književnici, slikari, muzičari, pozorišni djelatnici, istoričari. Od književnika posebno se izdvajaju Stjepan Matijević, Muhamed Hevai Uskufi, Matija Divković, Derviš Sušić, te jedan od najvećih bosanskohercegovačkih pisaca, Meša Selimović. Iz Tuzle potiču prvi školovani bosanskohercegovački slikari Đorđe Mihajlović i Adela Ber, te James Haim Pinto, jedan od vodećih američko-meksičkih muralista i Kristijan Kreković, slavni peruanski slikar, kao i najveći bosanskohercegovački slikar dvadesetog stoljeća, Ismet Mujezinović.

Međunarodna galerija portreta u Tuzli raspolaže djelima svih ovih umjetnika, a u okviru



galerije djeluje i Međunarodni atelje «Ismet Mujezinović». Svoje djelovanje ova galerija upotpunjuje organizacijom Međunarodnog bijenala portreta «Interbifep».

Muzej Istočne Bosne posjeduje arheološku, etnološku, historijsku, biološku, numizmatičku i umjetničku zbirku, koje čuvaju tragove kontinuiteta od gotovo 7000 godina života u tuzlanskom kraju.

Muzej solarstva, koji postoji u okviru Fabrike soli, baštini foto-dokumentacionu građu i predmete koji svjedoče o historiji solarstva u Tuzli.

Današnje Narodno pozorište Tuzla je najstarije pozorište u Bosni i Hercegovini, a kulturnu scenu grada upotpunjuju Teatar Kabare, alternativni Draft teatar, Bosanski kulturni centar, Dom mladih, Kuća Plamena mira, Francuski kulturni centar, osnovna i srednja muzička škola, brojna amaterska kulturno-umjetnička društva i udruženja, te niz drugih kulturnih i naučnih institucija, među kojima posebno treba istaći Narodnu i univerzitetsku biblioteku «Derviš Susić» i Historijski arhiv Tuzlanskog kantona. Jedan od najznačajnijih kulturnih događaja u regionu su tuzlanski književni susreti «Cum grano salis», na kojima se, dodjeljuje književna nagrada «Meša Selimović», za najbolji roman objavljen u prethodnoj godini na književnom prostoru BiH, Hrvatske, Srbije i Crne Gore.

Tuzla svoju renesansu doživljava u prvoj deceniji 21.stoljeća. Zahvaljujući pravilnom načinu korištenja slane vode kao posebnog prirodnog naslijeđa, Tuzla danas ima jedina slana jezera u Evropi. Radi se o tri slana jezera i slanim slapovima koji se prostiru na prostoru od sedam hektara i čine kompleks kojeg je od 2003. godine do danas, posjetilo više od 2,5 miliona ljudi. Tuzlanske plaže, trgove i parkove, svake godine posjećuje sve više turista.

Tuzla je i sportski centar Tuzlanskog kantona, u kojoj se nalaze mnogobrojni značajni sportstki objekti i djeluje više stotina klubova iz različitih sportskih grana.

Članom 4. Ustava Tuzlanskog kantona ("Službene novine Tuzlanskog kantona", br. 7/97, 3/99, 13/99 i 10/00) utvrđeno je da je Tuzla sjedište Tuzlanskog kantona.

Površina Tuzle iznosi 294 kvadratna kilometra, a čine je prema zvaničnim podacima Federalnog zavoda za statistiku slijedeća naselja i naseljena mjesta:

Brđani, Breske, Breze, Brgule, Bukinje, Cerik, Cviljevina, Čaklovići Donji, Čaklovići Gornji, Čanići, Dobrnja, Dokanj, Dragunja Donja, Dragunja Gornja, Gornja Tuzla, Grabovica Donja, Grabovica Gornja, Hudeč, Husino, Kiseljak, Kolimer, Kolovrat, Konjkovići, Kosci, Kovačevo selo, Kovačica, Krtolije, Kukovina, Lipnica, Lipnica Gornja, Lipnica Donja, Lipnica Srednja, Ljepunice, Ljubače, Marinkovići, Mihatovići, Milešići, Morančani, Mramor, Mramor novi, Obodnica Donja, Obodnica Gornja, Orašje, Osoje, Par selo Gornje, Pasci Donji, Pasci Gornji, Petrovice Donje, Petrovice Gornje, Plane, Pogorioci, Poljana, Potraš, Požarnica, Rapače, Rasovac, Simin han, Snoz, Svojtina, Ševar, Sići, Tetima, Tisovac, Tuzla, Vršani i Sićki brod. Prema posljednjem zvaničnom popisu stanovništva iz 1991. godine, ukupan broj stanovnika u općini Tuzla iznosio je 131.618, od čega 83.770 stanovnika, koji žive u gradskom središtu kao zaokruženom urbanom području, dok u prigradskim mjestima živi 47.848 stanovnika.

Izvor: Statistički godišnjak iz 1992. godine

Od 1991. godine, pa do danas u Bosni i Hercegovini nije vršen zvaničan popis stanovništva, već je Federalni zavod za statistiku u svojim publikacijama i na WEB stranici periodično objavljivao podatke rađene na bazi procjena navedene institucije.

Prema procjeni objavljenoj u publikaciji Federalnog zavoda za statistiku na dan 30.06.2006.

godine, ukupan broj stanovnika u općini Tuzla iznosi 131.393 stanovnika, od čega u gradskom središtu preko 83.000 stanovnika.

S druge strane, prema procjenama Općine Tuzla, u Tuzli danas živi 151.896 osoba. Do navedenih podataka došlo se na osnovu zvaničnih evidencija. Tako, prema evidenciji CIPS-a u Tuzli je evidentirano 123.848 osoba. S druge strane, prema evidenciji Službe za opću upravu i društvene djelatnosti sa mjestom rođenja u Tuzli, ima ukupno 6.280 osoba starosti od 0-6 godina, 11.540 osoba koje pohađaju osnovnu školu (djeca od 7-14 godina) i 10.594 osobe, koje pohađaju srednju školu (osobe od 15-19 godina). Ako se zbroje navedene cifre, u Tuzli trenutni živi 151.896 stanovnika. Prema podacima Ministarstva obrazovanja, nauke, kulture i sporta Tuzlanskog kantona, u Tuzli ima 27 osnovnih škola, od kojih su 23 redovne osnovne škole, dvije specijalne osnovne škole, jedna umjetnička škola, jedna međunarodna škola. Prema istom izvoru, u Tuzli egzistiraju tri gimnazije, devet mješovitih srednjih škola, dvije tehničke srednje škole, jedna srednja umjetnička škola i jedna srednja vjerska škola.

U posljednjih nekoliko godina, podstiče se razvoj malog i srednjeg biznisa. U svrhu poticaja malog i srednjeg biznisa, a naročito podsticanja zapošljavanja mladih i visokostručnih kadrova u Tuzli su osnovani Razvojno proizvodni centar Lipnica i BIT centar Tuzla (Biznis inovacioni Centar Tuzla).

Kako bi iskoristili prirodne pogodnosti u Tuzli, nastale kao rezultat postojanja slane vode, naporima Općinskog vijeća i općinskog načelnika, realiziran je projekat Panonskog jezera na lokalitetu Pinga, čime je nekada zapušten lokalitet, pretvoren u vrlo atraktivno kupalište u centru grada i stvoreni uvjeti za dalji razvoj turizma u Tuzli, koja je za zasluge u razvoju turizma osvojila zlatnu "Turističku ružu".

S obzirom da je Tuzla sjedište Tuzlanskog kantona, te imajući u vidu činjenicu da je nesporno da u Tuzli danas živi više od 130.000 stanovnika, od čega preko 80.000 u užem gradskom jezgru i da ona predstavlja urbanu, infrastrukturnu cjelinu povezanu svakodnevnim potrebama stanovništva je Tuzla, pa samim time ispunjava kriterije iz člana 5. st. 2. i 3. Zakona o principima lokalne samouprave, Općinsko vijeće Tuzla je na svojoj sjednici održanoj dana 30.01.2007. godine, donijelo Odluku o proglašenju Grada Tuzla i Zaključak o pokretanju Inicijative za izradu Zakona o uspostavljanju Grada Tuzle.

Kako su ispunjene zakonske pretpostavke za donošenje Zakona o uspostavljanju Grada Tuzle, Općinsko vijeće Tuzla inicira da Parlament Federacije Bosne i Hercegovine u okviru svoje nadležnosti donese navedeni zakon.

### **III - OBRAZLOŽENJE PRAVIH RJEŠENJA**

Odredbom člana 1. propisan je predmet zakona

Odredbom člana 2. je propisano da se Grad Tuzla sastoji od naseljenih mjesta koja se pojedinačno navedena u zakonu.

Odredbama čl. 3, 4 i 5. je propisano da je grad Tuzla jedinica lokalne samouprave i ima svojstvo pravne osobe, da su samoupravni organi grada Tuzle su gradsko vijeće i gradonačelnik i propisan njihov izbor i druga pitanja.

Odredbom člana 6. je propisano da Grad ima Statut te ostala pitanja koja se rješavaju statutom.

Odredbom člana 7. je propisano da je grad Tuzla je pravni sljedbenik Općine Tuzla.

Odredbama čl. 8. se reguliše pravno sljedbeništvo Grada Tuzle u odnosu na Općinu Tuzla.

Ova odredba je neophodna kako bi se obezbijedio kontinuitet izvršavanja nadležnosti Vijeća, Načelnika i organa uprave, javnih preduzeća i javnih ustanova.

Odredbom člana 9. je propisano da će općinski vijećnici Općine Tuzla izabrani na oćinskim izborima za Općinu Tuzla održanim 2012. godine donijeti će Privremenu statutarnu odluku grada Tuzle u roku od dva mjeseca od dana stupanja na snagu ovog zakona, koja će važiti do donošenja Statuta Grada.

Odredbom člana 10. je propisano da određeni zakoni koji su do sada regulisali pitanje Općine Tuzla prestaju da važe.

#### **IV - SREDSTVA ZA PROVOĐENJE ZAKONA**

Za provođenje ovog zakona nije potrebno osigurati sredstva iz Budžeta Federacije BiH.